

Na osnovu člana 13. stav (1) Zakona o prekršajima protiv javnog reda i mira ("Službene novine Kantona Sarajevo", broj 18/07, 7/08 i 34/20), člana 13. stav (2) Zakona o principima lokalne samouprave u Federaciji Bosne i Hercegovine („Službene novine FBiH“, broj: 49/06 i 51/09) i člana 26. Statuta Općine Stari Grad Sarajevo („Službene novine Kantona Sarajevo“, broj: 20/24), Općinsko vijeće Stari Grad Sarajevo, na 7. redovnoj sjednici, održanoj dana _____ donijelo je

(N a c r t)

ODLUKE O PREKRŠAJIMA PROTIV JAVNOG REDA I MIRA

I - OPĆE ODREDBE

Član 1. (Predmet)

Odlukom o prekršajima protiv javnog reda i mira (u daljnjem tekstu: Odluka) utvrđuju se prekršaji protiv javnog reda i mira na području Općine Stari Grad Sarajevo (u daljnjem tekstu: Općina) i prekršajne sankcije koje se izriču počiniocima prekršaja, a koji nisu propisani Zakonom o prekršajima protiv javnog reda i mira.

Član 2. (Prekršaji protiv javnog reda i mira)

Prekršaji protiv javnog reda i mira, u smislu odredaba ove Odluke, su djela kojima se na nedozvoljen način remeti mir, red i normalan način života građana, stvara neraspoloženje, uznemirenost ili ometa kretanje građana na ulicama i drugim javnim mjestima ili se na drugi način narušava javni red i mir građana utvrđen ovom Odlukom.

Član 3. (Prekršajne sankcije)

Za prekršaje protiv javnog reda i mira, u skladu sa ovom Odlukom, može se izreći novčana kazna i zaštitna mjera privremenog oduzimanja predmeta.

Član 4. (Značenje izraza)

Pojedini izrazi upotrijebljeni u ovoj Odluci imaju sljedeće značenje:

a) "Javno mjesto" u smislu odredaba ove Odluke je javno mjesto definisano članom 4. Zakona o prekršajima protiv javnog reda i mira ("Službene novine Kantona Sarajevo", broj 18/07, 7/08 i 34/20)

b) "Vračanje" je korištenje lakovjernosti osobe, najčešće proricanjem sudbine, odnosno budućnosti koje se obavlja za novac ili drugu protivuslugu.

II - PREKRŠAJI PROTIV JAVNOG REDA I MIRA I PREKRŠAJNE SANKCIJE

Član 5.

(Prekršaji i novčane kazne za fizička lica)

(1) Novčanom kaznom od 100,00 KM kaznit će se za prekršaj:

- a) ko uznemirava stanare upotrebom telefona, zvonceta ili interfona ili kucanjem na vrata stana bez potrebe, kao i radi prodaje robe, gatanja ili proricanja sudbine ili pružanje usluga koje nisu ugovorene ili naručene,
- b) ko pršće prolaznike vodom prilikom pranja ulica, pločnika ili dvorišta, zalijevanja vrtova ili travnjaka ili od vozila u pokretu,
- c) ko pere motorna vozila ili prosipa motorna ulja na mjestu gdje to nije predviđeno,
- d) ko pere tepihe i druge predmete ispred zgrada ili ko istresa tepihe, jorgane, posteljine, stolnjake i druge predmete i otpatke sa balkona i terasa stambenih zgrada,
- e) ko sapira balkone vodom koja se sliva niz zgradu, odnosno balkone,
- f) ko parkira motorno vozilo uz rijeke, vodotoke i zelene površine bez odobrenja nadležnog organa,
- g) ko prodajom novina, ispred i na raskrsnicama, ugrožava sigurnost učesnika u javnom saobraćaju.

(2) Novčanom kaznom od 150,00 do 450,00 KM kaznit će se za prekršaj:

- a) ko baca na prolaznike i vozila led ili snijeg sabijen u grudve, kamenje ili druge predmete ili ko baca na prolaznike predmete, hranu ili prosipa tekućinu iz zgrada ili ograđenih prostora,
- b) ko pere prozore ili druga stakla na vozilima ispred i na raskrsnicama,
- c) ko piše grafite po fasadama i ulazima zgrada, javnim prevoznim sredstvima, spomenicima, potpornim zidovima, reklamnim panoima i sl.,
- d) ko lomi ili na drugi način oštećuje ili uništava sadnice i rasad na javim površinama,
- e) ko se vješa ili penje na sredstva javnog gradskog saobraćaja ili ko iskače, izlazi ili se

naginje iz sredstva javnog gradskog saobraćaja u pokretu,

f) ko se bavi prodajom ulaznica za sportske, bioskopske ili druge priredbe na mjestima koja nisu određena za tu svrhu,

g) ko pomjera kontejnere za smeće sa mjesta koja su utvrđena odlukom nadležnog organa ili ko odlaže smeće mimo kontejnera ili ko pali vatru u i oko kontejnera za smeće ili ko ošteti kontejner za smeće,

h) ko ulazi ili se okuplja u napuštenim privatnim ili državnim objektima,

i) ko šutiranjem lopte u fasade zgrada, reklame, panoe, ograde i vozila u mirovanju uznemirava stanare i prolaznike i nanosi štetu navedenoj imovini,

j) ko u svojstvu vlasnika, zakupca ili korisnika stambenog objekta, porodične zgrade, zgrade kolektivnog stanovanja, poslovnog objekta i zemljišta, odlaže napuštena, neregistrovana, havarisana vozila ili dijelove vozila u dvorištima, vrtovima, voćnjacima, dijelovima trotoara, ulaza i prilaza u objekte,

k) ko kao učesnik u saobraćaju iz vozila u stanju kretanja ili mirovanja izbacuje otpad (opuške, razne ambalaže, kese, papir, flaše i sl.),

l) ko izvodi pse u šetnju bez zaštitne brnjice i povodca i ko ne veže propisno životinju/kućnog ljubimca i time uzrokuje uznemirenje i strah kod drugih lica,

m) ko postupa sa životinjama na način kojim izaziva uznemirenje ili negodovanje građana, ili ko ne ističe upozorenje na opasnost na ulazu u zatvoreno dvorište ili drugi određeni prostor gdje su smještene opasne životinje ili ko uvodi životinje u prodavnice i slične objekte,

n) ko kupu životinje ili ne ukloni nečistoće iza životinja na javnom mjestu, i

o) ko surovo postupa sa životinjama, izaziva ih ili ih podstrekava na borbu, ili ko kolje životinje na javnom mjestu, izuzev u dvorištima i baštama individualnih stambenih objekata za vrijeme vjerskih praznika.

(3) Novčanom kaznom od 400,00 do 600,00 KM kaznit će se za prekršaj:

a) ko se bavi vraćanjem, proricanjem sudbine ili sličnim obmanjivanjem, ili ko objavljuje oglase, propagira ili na drugi način građane poziva ili podstiče da se podvrgnu vraćanju ili proricanju sudbine, ili ko u vraćanju na bilo koji način pomaže licu koje se bavi tim aktivnostima,

b) ko, u svojstvu učesnika ili posjetioca, unosi alkoholna pića u sportske i kulturne objekte za vrijeme održavanja sportskih i kulturnih manifestacija,

c) ko konzumira alkohol na otvorenim prostorima, parkovima, ispred prodavnica i drugim prostorima koji nisu za to predviđeni, ili ko omogućujući da se ispred prodavnice ili drugog poslovnog objekta ili prostorija koje nisu za to predviđene, konzumiraju alkoholna pića,

d) ko nedozvoljeno koristi javnu površinu bez odobrenja nadležnog organa,

e) ko prodaje robu ili pruža usluge na javnim površinama bez odobrenja nadležnog organa i bez obzira da li se nalazi u svojstvu trgovca,

f) ko neovlašteno izvodi radove na instalacijama i provlači nove instalacije u stambenim zgradama za čije je izvođenje potrebno odobrenje i saglasnost nadležnog organa,

g) ko u zajedničkim dijelovima stambenih i drugih zgrada pali vatru,

h) ko poslije izvođenja radova na infrastrukturi, površinu ne dovede u prvobitno stanje,

i) ko uznemirava građane pjevanjem, vikanjem, sviranjem, puštanjem muzike ili stvaranjem sličnih izvora buke u stambenim zgradama ili u naseljenim mjestima ili na otvorenom prostoru u vremenu od 16,00 do 18,00 sati i od 22,00 do 07,00 sati narednog dana,

j) ko stvaranjem nepotrebne buke sječom drva i drugih drvenih i metalnih predmeta u vremenu od 17,00 do 19,00 i 22,00 do 08,00 sati,

k) ko ometa javno pozivanje vjernika na molitvu, u vrijeme ezana, stvaranjem buke izvođenjem i reprodukcijom muzičkih i drugih sadržaja i

l) roditelj, usvojilac, odnosno staralac maloljetnika koji je učinio prekršaj protiv javnog reda i mira propisan ovom Odlukom, ako je izvršenje prekršaja posljedica njegovog propuštanja dužnog staranja o maloljetniku, a u mogućnosti je da takav nadzor vrši.

(4) Novčanom kaznom od 600,00 KM do 800,00 KM kaznit će se za prekršaj:

a) ko u ugostiteljskom objektu kao i u njegovoj neposrednoj blizini, baštama objekata, stvara buku izvođenjem i reprodukcijom muzičkih i drugih sadržaja bez odobrenja ili suprotno odobrenju nadležnog organa u vremenskom periodu od 22,00 do 06,00 sati, odnosno u vremenskom periodu od 02,00 do 06,00 sati u noći sa petka na subotu i subota na nedjelju kao i u dane održavanja posebnih kulturnih manifestacija i događaja od značaja za Kantona Sarajevo i Općinu Stari Grad Sarajevo u cjelini (kao npr. Sarajevo Film Festival i sl.), u vremenskom periodu od 04,00 do 06,00 sati te u dane praznika, uz poštivanje strogih pravila u pogledu ispunjavanja uslova za zaštitu od buke predviđenih Zakonom o zaštiti od buke ("Službene novine Kantona Sarajevo", broj 23/16), kao i drugih pravila definisanih zakonskim i podzakonskim propisima i

b) ko u ugostiteljskom objektu stvara buku izvođenjem i reprodukcijom muzičkih i drugih sadržaja u neposrednoj blizini obrazovnih, zdravstvenih i vjerskih institucija u vremenskom periodu od 08,00 do 18,00 sati.

(5) Novčanom kaznom od 500,00 KM do 1000,00 KM kaznit će se za prekršaj

a) ko odlaže ili spaljuje otpad (smeće) i drugi nevegetacijski materijal (guma, plastika i sl.) mimo postavljenih posuda za otpad ili izvan sanitarne deponije otpada Kantona Sarajevo, odnosno na javnim površinama, mjestima ili u postrojenjima za koja nije izdato odobrenje za odlaganje odnosno spaljivanje otpada u skladu sa važećim propisima,

b) ko ispušta neprijatni miris iz proizvodnih pogona, ugostiteljskih objekata i drugih izvora,

c) ko u stambeno-poslovnim zgradama ispušta neprijatne mirise u sisteme ventilacije koji nisu predviđeni za te svrhe,

d) ko koristi putne kanale uz lokalne i nekatégorisane puteve, ulične slivnike (kao uređaje za odvodnju atmosferskih i otpadnih voda) za vođenje kišnice kroz oluke u fekalnu kanalizaciju i uvođenje fekalne kanalizacije u oborinske kanale, rijeke ili potoke,

e) ko ispušta u rijeke ili potoke zagađujuće materije i time uništava riblji i biljni fond,

f) ko u svojstvu fizičkog ili pravnog lica otvorene ili zatvorene slivničke kanale za odvođenje atmosferskih voda premoštava, začeplja, zasipa kao i na svaki drugi način preusmjerava vode cestovnog kanala, bez odobrenja nadležne općinske službe,

g) ko u svojstvu fizičkog ili pravnog lica izvrši bespravni priključak na komunalnu infrastrukturu (vodovodnu i kanalizacionu mrežu),

h) ko svojim postupanjem ometa rad službenih lica (redare javnih komunalnih preduzeća, inspektore i druga službena lica u obavljanju njihovih poslova i zadataka).

Član 6.

(Prekršaji i novčane kazne za pravna i odgovorna lica)

Novčanom kazom od 2.000,00 KM do 6.000,00 KM će se kazniti pravno lice, odnosno novčanom kaznom od 200,00 do 600,00 KM odgovorno lice u pravnom licu, za prekršaje iz člana 5. stav (1) tačka c), stav (2) tačka f), stav (3) tačke b), c), d), e), f), h), j) i k), stav (4) i stav (5) ove Odluke.

Član 7.

(Prihodi)

Prihod ostvaren naplatom novčanih kazni propisanih ovom Odlukom je prihod Budžeta Općine.

III - NADZOR

Član 8.

(Nadzor i provođenje odredaba Odluke)

(1) Provođenje odredaba ove Odluke vršit će nadležne inspekcije te nadležna policijska uprava, svako iz svoje nadležnosti.

(2) Policijska uprava i općinski načelnik najmanje jedanput godišnje izvještavaju Općinsko vijeće Stari Grad Sarajevo o izvršavanju odredaba ove Odluke.

Član 9.
(Privremeno oduzimanje predmeta)

(1) Kada u vršenju službenih poslova i zadataka saznaju za prekršaj propisan ovom Odlukom, policijski službenici ili inspektori mogu privremeno oduzeti predmete koji su upotrijebljeni ili su bili namijenjeni za izvršenje prekršaja ili koji su nastali izvršenjem prekršaja, kao i predmete koji mogu poslužiti kao dokaz u prekršajom postupku.

(2) O privremenom oduzimanju predmeta policijski službenici ili inspektori licu od koga su predmeti oduzeti izdaju potvrdu koja sadrži: naziv i sjedište organa čiji je policijski službenik ili inspektor oduzeo predmete, naziv, vrstu i količinu oduzetih predmeta, ime i prezime lica od koga su oduzeti predmeti i njegovu adresu, razlog oduzimanja, datum, vrijeme i mjesto oduzimanja, pečat i potpis policijskog službenika ili inspektora.

Član 10.
(Postupak sa oduzetim predmetima)

Odredbe člana 11. Zakona o prekršajima protiv javnog reda i mira ("Službene novine Kantona Sarajevo", br. 18/07, 7/08 i 34/20) odgovarajuće se primjenjuju i kada je u pitanju postupak za oduzete predmete za prekršaje koji su propisani ovom Odlukom.

IV - ZAVRŠNE ODREDBE

Član 11.
(Ravnopravnost spolova)

Gramatička terminologija korištenja muškog ili ženskog roda u ovoj Odluci podrazumijeva uključivanje oba roda.

Član 12.
(Prestanak primjene važeće Odluke)

Danom stupanja na snagu ove Odluke prestaje da važi Odluka o prekršajima protiv javnog reda i mira ("Službene novine Kantona Sarajevo", br. 39/07 i 23/17).

Član 13.
(Stupanje na snagu)

Ova Odluka stupa na snagu osmog dana od dana objavljivanja u "Službenim novinama Kantona Sarajevo".

PREDSJEDAVAJUĆI
OPĆINSKOG VIJEĆA STARI GRAD
SARAJEVO

Seid Škaljić

Broj: 02-45-_____/25
Sarajevo, maj 2025. godine

O b r a z l o ž e n j e

I - PRAVNI OSNOV

Pravni osnov za donošenje Odluke o prekršajima protiv javnog reda i mira (u daljnjem tekstu: Odluka), sadržan je u preambuli Odluke.

Odredbama člana 13. stav (1) Zakona o prekršajima protiv javnog reda i mira ("Službene novine Kantona Sarajevo", broj 18/07, 7/08 i 34/20) propisano je da gradsko, odnosno općinskog vijeća može, u skladu sa ovim zakonom, svojom odlukom propisati i druge prekršaje protiv javnog reda i mira.

Odredbama člana 13. stav (2) Zakona o principima lokalne samouprave u Federaciji Bosne i Hercegovine („Službene novine FBiH“, broj: 49/06 i 51/09) i člana 26. Statuta Općine Stari Grad Sarajevo („Službene novine Kantona Sarajevo“, broj: 20/24) propisane su nadležnosti Općinskog vijeća za donošenje propisa i akata u okviru prava i dužnosti Općine.

II - RAZLOZI DONOŠENJA

Prekršaji protiv javnog reda i mira na području Općine Stari Grad Sarajevo (u daljnjem tekstu: Općina) i prekršajne sankcije koje se izriču počiniocima prekršaja, a koji nisu propisani Zakonom o prekršajima protiv javnog reda i mira, regulisani su Odlukom o prekršajima protiv javnog reda i mira ("Službene novine Kantona Sarajevo", br. 39/07 i 23/17).

Nacrtom ove Odluke o prekršajima protiv javnog reda i mira (u daljnjem tekstu: Odluka), nije se u značajnoj mjeri mijenjala postojeća Odluka, s obzirom da su zadržani svi prekršaji protiv javnog reda i mira utvrđeni istom, ali se u praksi javila potreba za regulisanjem novih prekršaja i sankcija za iste, kao što su sankcije za fizička ili pravna lica koja poslije izvođenja radova na infrastrukturi, površinu ne dovedu u prvobitno stanje, sankcije za nepropisno odlaganje ili spaljivanje otpada (smeća) i drugih nevegetacijskih materijala (guma, plastika i sl.), za ispuštanje u rijeke ili potoke zagađujuće materije, izvođenje bespravnih priključaka na komunalnu infrastrukturu (vodovodnu i kanalizacionu mrežu), začepljavanje i premoštavanje slivničkih kanala za odvođenje atmosferskih voda i preusmjeravanje vode cestovnog kanala, ometanje rada službenih lica (redara javnih komunalnih preduzeća, inspektora i drugih službenih lica u obavljanju njihovih poslova i zadataka), sapiranje balkona vodom koja se sliva niz zgradu, odnosno balkone itd.

Također se javila i potreba za usklađivanjem postojećih odredbi Odluke o prekršajima protiv javnog reda i mira vezanih za prekršaje u pogledu stvaranja buke i izvođenja i reprodukcije muzičkih i drugih sadržaja u ugostiteljskim objektima, kao i u njihovoj neposrednoj blizini i baštama objekata, sa odredbama Odluke o radnom vremenu u određenim djelatnostima na području Općine Stari Grad Sarajevo („Službene novine Kantona Sarajevo“ broj:14/24), a sve kako bi se zadovoljile potrebe građana i mnogobrojnih turista, ali i pružila podrška privrednim subjektima na području Općine i unaprijedila turistička ponuda, posebno u ljetnim mjesecima kada se održavaju brojne manifestacije i događaji od značaja za Kanton Sarajevo i Općinu Stari Grad Sarajevo u cjelini, a što je i jedan od strateških ciljeva ove lokalne zajednice.

Uzimajući u obzir sve naprijed navedeno, kao i činjenicu da je od dana donošenja Odluke o prekršajima protiv javnog reda i mira ("Službene novine Kantona Sarajevo", br. 39/07 i 23/17), protekao duži vremenski period, predlaže se opredijelio da pristupi izradi nacrta

nove Odluke o prekršajima protiv javnog reda i mira na području Općine Stari Grad Sarajevo, kako bi se isti uputio na javnu raspravu svim zainteresovanim subjektima te predmetna oblast regulisala na što kvalitetniji način.

Imajući u vidu sve naprijed navedeno, Općinski načelnik predlaže Općinskom vijeću Stari Grad Sarajevo da utvrdi ovaj Nacrt Odluke.

III– FINANSIJSKA SREDSTVA

Za provođenje ove Odluke nisu potrebna finansijska sredstva.

PREDLAGAČ
Općinski načelnik
putem Stručne služba kabineta Općinskog načelnika